

# Fasnacht 2020



**KNOCHESTAMPFER  
WAGGIS**

SIT 1972

## Sujet:

### Zwanzig Joor e Gnuss – im Fluss!

Am e scheene Daag – scho lang isch's häär  
kunnt uffem e Flooss dr Bach drhäär  
en Art e Clochard, und dä seet grad dry  
als kenn er die bekannt Figuur vom Hääre sy  
wo als im Jänner uff em Rhy  
aabezfaare kunnt, aggdv und voller Energie  
aber s'hett kai Dännli und au Beller die sinn nit derby  
und so merggds denn au e jede gly  
au wenn er em duet glyyche – dr Wild' Maa – ka's nit sy  
trotdäm – isch denn das e Witz?  
haltet au dää bym Kaffi Spitz  
ussgrächnet, dasch jo allehand  
am hailige Drei-Ehre-Strand!  
Timo haisst er – und Idee schmaisst er  
hett – kreativ in allne Poore  
by uns in Basel s' Härz verloore  
und ungoor so isch gnau vor zwanzig Joore  
uff synere «Freiliecht-Brätter-Sound-Empoore»  
sy Muusig-Show «Im Fluss» geboore!  
d Grundidee isch gsy, dass me do unverfroore  
e Party loosleggt mit Furoore  
wo vo Teenies bis zue Seniore  
dangg Pop, Blues, Rock und au Folklore  
basse kennt fyr alli Oore  
gly aber foot me n aa z rumoore  
und scho hänn sich gege das e baar verschwoore  
ohni aanezluege mischt sich gly  
– s miesst jo nit in Basel syy –  
die halbi Stadt in d' Party yy  
und scho mainsch, jetz isch dr Spass verby  
aber statt to be or not to be  
macht dr Timo wyter mit vyyl Energie  
laufft e Hufe Dyyre und au Aemter yy  
de Gegner hett e Gang zum Bundesricht nyt gnyzt  
im Gegedail, die Sach rund um e Lärm, die isch gryzt  
«Im Fluss» gilt sitthäär als Kulturguet und isch gschytzt  
denn unde am Rhybord in Stimmig schwääbe  
isch's au nit so ruehig – so isch's doch nit ganz dernäabe  
und drei Wuchen im Joor – sott me das yberlääbe  
und e bitz Toleranz isch gwyys nit vergäabe  
denn s'isch immer im Timo sy Besträäbe  
dass alli wo Fraid hänn, nass oder drogge  
statt wie friehner dert unde um Drooge z'zogge  
jetz friedlig am Rhybord zämmehogge  
sygs gstylt mit Aazug und Laggschueh – oder in Jeans mit Sogge  
sich gratis und franko vom Sound loo z verlogge  
zum uff die Art Kultur mit em Volgg z verbinde  
hett sich dr Timo nit schlächt miesse schinde  
vo Aafang aa gueti Grubbe z finde  
nit wärelwär oder waseliwas  
und dr Durchbruch isch glunge mit «Stiller Has»  
Was isch besser, Kultur z vermiddle  
oder ohni derby z'sy dr Kopf afoo schittle?  
Vergliche mit däm wo ooben amme  
in Sache Kultur die overschti Mamme  
verbutzt, kocht dr Timo uf glainer Flamme  
17 Konzärt in drei Wuchen am Rhy  
und numme grad Swisslos isch derby  
als Styrzaaler sottsich jo no danggbar sy..  
sone Muusig Flooss in vollem Schwumm  
isch fyr die ganze Stadt nit dumm  
und wirft s Kulturbudget nit um  
sogar als Ferie-Hit isch's in  
fyr die wo dehaime blyybe sinn  
Das Floss im Rossballe-Mississippi  
isch au e Highlight fyr ussgflippti Hippie  
dr Timo isch dangg sym Tessiner Flair  
Il Capitano del Barco Open-Air  
aagfange hetts als grosse Spleen  
hitt käm er sich vor wiene «Drama Queen»  
und «Im Fluss» haig er «drei Wuche Halloween»  
Aim laufft z weeni aim laufft zvyyl  
fyr e Gnuss im Fluss ganz ohni Ghyyl  
hett au dr Timo nur ai Zyyl  
nämed Ruggsicht uffenand  
feschtet aber mit Verstand  
und nit usser Rand und Band  
reedet zämme, gänd Eych d Hand  
stegged nit dr Kopf in Sand  
sind mitenander tolerant  
S Glyych das kenne mir Eych mälde  
soll jo au fyr d Fasnacht gälte  
die Ainte finde das immer e luschtigi Sach  
fyr die andere macht au das z vyyl Grach  
also was uns aagoot – mir saage's bezytte  
zellt in jedem Fall numme die luschtige Sytte!  
fyr uns Knochestampfer isch's glaar – unsre Schuss isch duss:  
ob Fasnacht oder Im Fluss – mir hänn by baidem voll dr Gnuss!  
...aber trotdäm simmer doch noni am Schluss....:  
denn uss aktuellem Grund gits none Plus...  
just zum disjeerige Gryffemääli  
hooft me dr Timo als Ehregascht ins Sääli  
und dass me nen offiziell duet begriesse  
hett nadyrlig au no uff dä Zeedel miesse  
vo hinde seesch in Schaale sy ganzi Figur  
aber bliiben isch wie in Natur d Frisur  
är dräjt sich um und luegt mi aa  
wie mer's Aafang gsait hänn – dängged dra  
vom Gsicht här isch er ganz dr Wild Maa  
nur ebbis isch am Vogel Gryff s bsunders Glatte:  
e Wilde Maa hetts no nie gää – mit Krawattel!

D Ladäärne-Uusstellig uff em Minschterplatz und d Waage- und Reggwisyte-Uusstellig bi dr Kasäärne sin vom Määntig znacht bis am Mittwuch demoorge! Deert und an de 3 Verkaufsständ (CINS) in dr Stadt kamen au alli Zeedel und Schnitzelbängg, d Blaggede und dr Rädäbängg kaufe.